

25 OCT 2003

MASING BERI PENGHORMATAN KEPADA KEPIMPINAN ALFRED JABU

KAPIT, 25 Okt (Bernama) -- Bangsa dayak Sarawak, khususnya Iban, perlu merapatkan barisan dan berdiri teguh di belakang kepimpinan Timbalan Ketua Menteri, Tan Sri Alfred Jabu anak Numpang, berdasarkan kualiti kepimpinan yang dimilikinya, kata Menteri Pembangunan Sosial dan Urbanisasi, Datuk Seri Dr James Jemut Masing.

Beliau berkata ia berdasarkan usaha gigih Alfred Jabu yang berterusan selama hampir 30 tahun dalam kabinet Sarawak, demi meningkatkan martabat masyarakat dayak dalam negeri.

"Beliau sering menjadi pelaksana setiap kerja-kerja yang baik untuk masyarakat, dan keikhlasannya kadang-kala disalah anggap oleh kaum Iban sendiri," katanya dalam sesi pemimpin bersama rakyat di Rumah Kilau di Tunoh, Ulu Mujong dekat sini, malam tadi, yang turut dihadiri Jabu.

Dr Masing berkata Jabu juga terpaksa menerima banyak kritikan terhadap usaha-usahanya gigihnya dalam membantu masyarakat, dan menurutnya "beliau masih boleh bertahan sehingga kini".

"Jika semua bangsa dayak dapat bersatu di belakang Tan Sri Jabu, kita boleh jadikan dia sebagai Dr Mahathir dalam masyarakat ini," katanya dengan merujuk kepada kegigihan Perdana Menteri Dr Mahathir yang akan bersara hujung bulan ini, sebagai banyak membantu dalam meningkatkan martabat kaum Melayu.

-- BERNAMA

ESS AZH